

**Ngu jo cjua xi chja
xujun changá tsëhë Nina XII**

Historias del Antiguo Testamento XII

2 Reyes 22:51-23:30, Isaías, Miqueas, Jeremías 1-6




en el mazateco de Chiquihuitlán de Juárez

**Ngu jo cjua xi chja
xujun changá tsëhë Nina XII**

Historias del Antiguo Testamento XII

2 Reyes 22:51-23:30, Isaías, Miqueas, Jeremías 1-6



**Las ilustraciones en las páginas 2 y 6 al fin son propiedad de la Fundación David C. Cook,
usadas con permiso.**

Primera edición
Historias del Antiguo Testamento XII
en el mazateco de Chiquihuitlán de Juárez
México, D. F. .6C
Febrero de 1994

Historias del Antiguo Testamento XII

Profeta Isaías ne, vetsihin me chja me cjua rë Nina cojo xuta nangui Judá

(Isaías 1-6)

Hya xi cavatju casahmi Uzías gubiernu nangui Judá xcun jemu
cjín nu ne, Nina ne, catsingatju me profeta Isaías xi cuichja me cjua
rë Nina cojo xuta tséhë nangui Judá cojo nandya tahandee rë.

Cuitjin cachja Isaías cojo xuta nangui Judá:

—Cuitjin cachja Nina: “Ngayujun ni ngayun ne, xuta
hngacacun ngayun, chjuun cuenda ná handasa xi casacu nuju yëjë
cjuandaja xi casatë nuju ngatsë naha. Casahme cojo nuju sacuaha
sahmi ngu nahmi xi ndaja; peru ngayun ne, nuhyuun sacuaha
vihndiin ngu quihndi hngacacun. Catsingátju nuju yëjë ni xcusun
cjuacjintacun cojo sa xi cumachaya nuju xi mameje cjuandaja naha.
Yëjë nangui nuju ne, cavetsun. Ngu sá nandya Jerusalén ne, nandya
vëhë xi tacun cuaha nuju.”

'Nina ne, hatuxa matitjun me tsëhë yëjë ni mé xi tjin, hane sá xi catsicanguiin me xuta xi cuma tjë naja ne, tangun ni cafë ngayaan sacuatjin cafë camahani xuta nandya Sodoma cojo xuta nandya Gomorra.



'Cuitjin chja Nina: "Tu tsejen xi quihndë tsajin mé cuma sahme cojo sa xi ningatuhuntacunndujun. Má tsíhi ná xi vutséjen chu xi tuhun ná sacuaha cjuatjo. Caveni tuhun ta hacuiin tyjahi cjuatacun

nuju. Hacuaha sahmecuendaan nixtin rë suhi xi nihñu tsahan. Hndeen tsujun hya xi nihñu oración ta tséhë xi cjuinduju sa nihñu cjuatsehen. Tejñuxun cjuatsehen. Nihñuchuhun cjua rë ley naha cojo sa xi cuma ndaja ngayun cojo yëjë xuta, cojo xuta yuma, cojo hndixahan, cojo na cahan. Nduvun, cuisiajme naja hane sacuse naja hacutjin cumá. Handasa cuatjin choho canihñu ne, tsityjáhi cjuatacun nuju sacuaha tyjahi tsejen hnchan xi vixun tséhë ngahnga hane ndaja cuatjun cuma. Peru sá xi cuinuhyuun ne, jercu cjín sa cjuacjintacun cuatjun, ta nguiñña ngucha ne, ndastu xuta nandya Jerusalén ne, catsinga me yojo rë me xi macjain rë me ngahan hane casahmi jain me cjuandaja cojo rë xuta. Peru quihndë ne, hisca me vëhë ne, xuta tsiquehen cavuya me, hacuaha cjuaha me tujún xi cuaxëtje me xcusun rë xuta tsehen. Vëhë xi cuya suá nuju cjuañihi hisca xi cuyun chjuhunrcun nga ná.”

Quijinduju cachja Isaías cuitjin:

—Cjuehe nixtin xi ngayëjë ni xuta xi siu me ngasunhndë ne, cuinduva me yungun rë Nina xi siu Jerusalén cojo sa xi sacuse rë me cjua quixi rë cjua rë Nina. Hya ne, sahmii xuta si. Vëhë xi tundecja

me quicha rë si sehe tsindaja me quicha rë xa nguijña. Cuatjin cumá. Peru chaja sa xi cumá cuatjin ne, cuatju xuta nandya Judá cjuañhi rë me tséhë xi faharcun me nina ndacha. Jercu cumatsejen ngahñu cjua rë Nina, hane cuanga xuta xi meje cuiyujuhma me tséhë. Hane scandi me nina ndyojo rë me hya xi tivanga me. Cuatjin cumá ta xuta nandya Jerusalén cojo xuta nandya xicjin me ne, tangun hngacacun me sacuaha xi hngacacun camá xuta nangui Sodoma. Hane xuta xi matitjun rë me ne, hitsë sa hngacacun me ta tséhë xi jercu choho sahmi me cojo xuta yuma hacuaha xuta ngarca ne, tjengui me xcusun chojyihì rë me. Sehe tsinguijnetaha Nina cjuañhi xi casua me xuta tséhë nangui Judá. Tsinchataha me yéjë ni me xi siu cuaha nixtin hya, yéjë ni me xi choho casahmi me. Sehe Jerusalén cuma nga ngu nandya xi catuxihin rë tséhë cahndë rcun rë me.

Sehe cachja Isaías cuitjin:


—Ngayun xuta nangui Judá ne, tangun ngayun cojo nahñu rë uva xi jemu ndaja camá cuidadu rë. Peru handasa cuatjin ne, casuaain tuhaxi xi ndaja chine. Véhë xi nai rë nangui vë ne, cavejña



Esta ilustración
no está
disponible.

me xi tsinguetsun me. Cuatjin camá nuju cojo Nina. Jemu ndaja sahmi me cojo nuju, hane vetahacacun me xi ndaja nihñu. Peru ngayun ne, hacuiin ndaja xcusun nuju hacuaha suva xindajin nihñu cojo xingun. Cavetjun cjuanchina nuju sá ndihya sá nangui xitjë xi meje nuju cuma tsujun. Jercu meje nuju cjuachihi. Cha juece nuju ne, joho ni rë cha fahatsja cha tujún chëjë hane sahmichihin cha cjuacjintacun rë xuta tsehen xi cavechji rë cha. Tséhë yëjë jyë vëhë ne, Nina ne, sahmi me xi xuta tséhë ngu nanguixin ne, cuinduva me sahmi me si cojo nuju. —Cuatjin cachja Isaías cojo xuta.

Hya xi camá ne, xcun nu xi cahme xuta matitjun Uzías ne, ngu nixtin hya ne, jiya Isaías cahntsua yungun. Hane ngajan ne, cachja cojo me ngu chini tséhë Nina cojo yëjë ni ngahñu rë me. Cavëë me ñuju xcusun xi quicun xi hmi rë serafine xi cachja me cuitjin: “Tyjahi, tyjahi, tyjahi camahani Nina xi jemu hñu cjua. Tu jani



tsëhë ngasunhndë ne, catsë rë cojo ngahñu cjua rë me.” Hane xi má rë Isaías ne, hacuaha cojo me cuma me castigu ta hacuaha xuta jyë má me xi tacun me xcun Nina. Peru ngu serafine jan cafaha ngu quixun xi yaha rë ndihi rë ngasunscun hane cojo vëhë ne casatëtsja hntsua Isaías. Sehe cachja serafine ta Nina ne, catsinchataha me yëjë ni mé xi choho casahmi Isaías hacuaha cojo xi cachja me. Sehe cachja suva Nina cojo me cuitjin:

— ¿Yo xi cjue cojo cjua naja?, ¿yo xi ningatjun tixa naja?

Hya xi camá ne, cachja Isaías ta me vëhë sahmi me. Sehe cavitexa Nina Isaías xi cjue me cuichja me cjua vihi cojo xuta nangui Judá:

—Handasa cuisifnuju cjín cjua, peru cuijnii rcun. Hacuaha handasa chutsujun, cumatsijiin nuju.

Cuatjin cachja Nina ta tséhë xi jercu cjín xcusun tschen tisahmi me. Camatangun me sacuaha xi rca me o sa loho me, ta sahmi cuendaain me Nina. Peru meje xu rë xi Isaías ne, cjuenduju cuichja me cjua rë Nina cojo me hisca xi cuetsunya gubiernu rë nangui Judá.

Nixtin xi casahmi gubiernu Jotam cojo Acaz nangui Judá

(2 Reyes 15:32-16:20; 2 Crónicas 27-28; Isaías 7:1-9:7)

Hya xi cahme Uzías, me matitjun tséhë Judá ne, quihndi rë me xi hmi rë Jotam camá me xuta matitjun. Ndaja cavitexa me tséhë xi cahndë me cjua rë ley rë Nina. Hane Nina casahmi me xi Jotam ne, camá me ngu xuta hñu cjua. Cojo sindadu rë me cacaa rë me xcun ngu si xi camá cojo xuta amonita. Hacuaha jercu cjín sa xondyojo casahmi me, hane quijinduju me cojo xa xi cavetsihin nima nahmi rë me xi cavyujuhñu sa me xondyojo xi vitijnundee rë nandya Jerusalén. Hane hya xi cahme me ne, ha casahmi me gubiernu

tyjuhun ngu nu. Hane quihndi rë me xi hmi rë Acaz camá me xuta matitjun.

Jemu tsehen camahani camá Acaz, hane hisca hitsë cahndiin me tsöhë cjua rë ley rë Nina. Tangun xcusun rë me cojo xcusun chojyঃhi rë xuta matitjun tsöhë nangui Israel. Casahmi me xcusun xi sahmi xuta xi faharcun me nina ndacha, ta tsiquehen me quihndi rë me hane casua me quihndi jan cjuatjo rë nina ndacha jan. Hya xi camá ne, casua Nina cahndë xi sindadu cjín tsöhë nangui Siria cafaha xicjin me cojo sindadu cjín rë Judá hane caca rë me xcun si jan. Hacuaha hacuanitjin casahmi sindadu cjín tsöhë nangui Israel. Hane sindadu rë Israel ne, jemu cjín xuta nangui Judá quiji cojo me xi cumá me mosu hndixahan rë me. Sehe catsingatju Nina profeta Obed xi cachja me cojo xuta ladu Israel xi ndajintjin vë. Meje rë xi sua me cahndë xi cuya presu jan ndava me ta tangun nduva tjë rë me cojo xicjin me. Hya xi camá ne, catsismi me xicjin me. Hacuaha nixtin hya ne, sindadu rë nangui Edom ne, hacuaha cafahaxicjin me cojo xuta nangui Judá hane cafaha nga me nangui xi catsichaja me.

Ngu ndiya nga cavuya casahmi nga sindadu cjín jan si cojo xuta nangui Judá. Peru hya ne, catsingatju Nina Isaías xi cachja me cojo Acaz xi tsacjuiin me tséhë sindadu cjín tséhë Siria cojo Israel ta cumajin xi meje rë me.

Cuitjin cachja Isaías:

—Cuitjin chja Nina. Ndicumahani ndastu mé cjuachan cuatju nangui Judá cojo nandya Jerusalén. Peru sacuaha nangui Israel xi ladu rë Efraín ne, cahntsua xi jyanchan nu ne, tsajin ngu nangui xi cuatjin hmi rë. Sehe cachja Nina xi sua me ngu seña cojo sa xi vëë



me xi cjuaquixi cjua vë. Cachja me xi ngu na nixtin ne, sacu rë na ngu quihndi. Hane quihndi jan ne, suañhi me Emanuel. Emanuel ne, vëhë cjua xi vijne: Nina ne, jiya me ngajñi naja. Cachja me xi chaja sa xi tjin cjuetacun quihndi jan ne, xuta nangui Asiria ne, cuetsun me ngahiñu rë catsijo nangui condra rë Judá jan. Hacuaha casua Nina cjua rë me xi tsingatju me ngu me matitjun xi xatsë xi tjë rë David má. Hane me vëhë ne, cuinduva me cojo cjuandaja cjuajeya xi cuma rë nangui Judá. Jercu ndaja me, hacuaha chihin me cojo cjua rë me. Jercu ndaja cuatju me hacuaha jercu hñu cjua cumá me. —Cuatjin cachja Isaías cojo Acaz, me xi matitjun.

Peru handasa xi cahndë Acaz cjua jan ne, quiji cafehya me Tiglat-pileser, me matitjun tsëhë nangui Asiria xi cuisecoo me cjuaha xicjin me cojo xuta nangui Siria cojo nangui Israel. Hane cafehyain rë me Nina xi cuisecoo Nina me. Hane cojo sa xi ndaja scuëë Tiglat-pileser me ne, casua me me yëjë tujún cojo yëjë cjuanchina xi tacunxa yungun. Hya xi camá ne, sindadu ladu rë Tiglat-pileser ne, quiji cafaha xicjin me cojo xuta condra rë xuta nangui Judá, hane catsiquehen me me xi matitjun tsëhë Siria. Peru cahndë xi ndaja cavatju nandya Judá ne, choho cavatjun me ta

nangui Asiria cavitexa rë me me xi matitjun tsëhë me. Hane hitsë sa choho casahmi xuta Asiria vëhë cojo me xi cumá rë condra rë me, sá xuta nangui Siria o sá xuta nangui Israel.

Ngu nixtin hya ne, quiji Acaz nandya Damasco, nangui Asiria xi cuichja me cojo me xi matitjun rë. Hane ngu yëjë rë xi tacun me ngajan ne, cavëë me ngu ngasunscun xi jercu cachuya rë me tsëhë. Hya xi camá ne, cafaha cuenda me hacutjin camá ngasunscun vëhë, sehe catsingatju me cjua cojo nahmi Urías xi sahmi me ngu xicjin rë. Hane Urías ne, cavitexa me xuta xi sahmi me sacuaha meje rë me xi matitjun jan. Hya xi camandaja ne, cavitexa Acaz Urías xi sahmi me xa cojo ngasunscun vëhë hya xi cuaca me cjuatjo nchunchujun ni. Hane ngasunscun xi casahmi Salomón ne, suva cuma chji rëhë xi cjuehya me cjuetacun. Hane nahmi Urías ne, ha joho ni chja me tsëhë tu mé ni xi chja Acaz. Cavatju sa nixtin hane sehe cavechja Acaz yungun rë Nina. Casahmi me cjín ngasunscun tu nguehe tu ngajan nandya Jerusalén, hane cahndë xi cjue xuta yungun rë Nina cojo cjuatjo rë me ne, quiji me ngasunscun jan, hane casua me cjuatjo cojo nina ndacha. Tyjuhun ngu nu cavitexa Acaz nangui

Judá. Hane hya xi cahme me ne, quihndi rë me xi hmi rë Ezequías ne, camá me xuta matitjun.

**Isaías ne, chja me cjua rë Nina cojo xuta catsijo ladu,
sá nangui Israel, sá nangui Judá**

(Isaías 9:8-12:6)

Cachja Nina cojo Isaías xi cuichjataha me xuta nangui Israel.
Cuitjin cachja me tsëhë xuta vë:

—Xuta nangui Israel ne, jemu xta me; peru tifehe nixtin xi Nina ne, sahmi me xi jercu cumasava rë me. Nina ne, ha casua me cahndë xi xuta condra rë me ne, cacaa rë me xcun si xi cama cojo rë me. Peru handasa cama me castigu vë ne, cavuyaain cafaharcun me me. Vëhë xi casahmi Nina xi hitsë sa cjuañihi cavatju me camá. Suva me casahmi me ley xi ndajintjin, hane cojo ley vëhë ne, choho cuatju me ta vindacha me xicjin me. Miji cuiñuju me ley rë cjua rë Nina. Vëhë xi Nina ne, sahmi me xi xuta matitjun tsëhë Asiria ne, tsinguetsun me nandya rë me cojo gubiernu rë me. Cuatjin sahmi Nina xi cuma castigu tsëhë xi jemu cjín má jyê rë me. Me xi

matitjun jan ne, jemu hngacacun me, hacuaha jemu tsehen me, peru Nina ne, tsicojo xa rë me me xi sua me cjuañihi xuta nangui Israel cojo xuta nangui Judá. Tsicjë me tsinguetsun me nandya Samaria, cahndë rcun rë nangui Israel. Hacuaha cuaha xicjin me cojo xuta nandya rë Judá.

'Nina ne, sua xa rë me, me xi matitjun tsëhë Asiria jan, xi sua me cjuañihi xuta rë me, pero hya xi cajnetaha vë ne, sehe sua Nina cjuañihi me xi cuajyihi vë. Sua me cjuañihi ta tsingatahacacun me xi matitjun jan xi cojo ngahñu rë suva me ticaa rë me xi cjuaha me jercu cjín nandya xcun si ta jemu tjin rë me ngahñu hacuaha jercu quicun me. Cuatjin tsingatahacacun me. Peru hacuiin cuatjin ta yëjë xi sahmi me ne, sahmi me ta xa rë Nina tisahmi me. Hane hya xi sahmi hnga me yojo rë me ne, tangun cjuangarca sacuaha sá xi ngu quicha rcu ne, cuichja xi mamiji rë cha chjineya xi sahmi xa cha cojo ta cuma sahmi suva. Vëhë xi Nina ne, sahmi me xi cuma hmu rë me xi matitjun jan, cuma rë me ngu chihin suë cjan rë. Hya ne, xuta tsëhë nangui Israel xi cuiyuju cuaha me ne, cumacjain jain rë me Nina ngu xatsë nga. Peru hya ne, chuva má me xi cumá rë chuva mil xi camá me hatsëë.

'Vëhë xi ngayun, xuta nangui Judá ne, sahmií ngujyë xi rcun xuta nangui Asiria, ta cahntsua xi chuva nixtin ne, ha quihndë suaxtiin me ngayun. Sehe Nina ne, tsingatju nuju me ngu xuta tjë rë nahmi rë nima David xi cumá xuta matitjun nuju. Hasen rë Nina ne, sahmi rë me vëhë ngu xuta xi jemu cuechutaha cjuatacun rë me, hacuaha jercu ndaja me, jercu quixi me. Hane me vëhë ne, tangun ni cuitexa me jima ngu me cojo cjuauquixi. Nixtin hya ne, tsajin cjuachan ngasunhndë, sá ngajñi rë chu o sá ngajñi rë xuta. Chu hnditsanga ne, macha chu cojo chu xa. Tsajin mé xi choho sahmi o sá tsinguetsun rë ta, cjua rë Nina ne, vëhë cuitexa. Hiscan yëjë ladu ngasunhndë ne, cuinduva xuta xi cjuaharcun me me vëhë. Hane yëjë xuta tjë rë Israel xi tiviyujuxin me tsëhë nangui Israel ne, cuya cuiyuju me nangui rë xutachanga rë me. Hane xuta tjë rë Israel ne, sá ladu rë Israel o sá ladu rë Judá ne, tsajin cjuachan ngajñi rë me, hane ngu me vëhë cuitexa me yëjë ni me. Hane yëjë ni xuta jan ne, sua me nacuechji rë Nina.

**Profeta Miqueas ne, chja me cjua rẽ Nina cojo xuta
tsẽhẽ nangui Judá cojo xuta tsẽhẽ nangui Israel**

(Miqueas 1-7)



Nixtin xi camá Jotam xuta
matitjun hiscan nixtin xi Ezequías
cavitexa me ne, casahmi xa
profeta Miqueas ta cuatjin
cavitexa Nina. Hane cachja me
cjua rẽ Nina cojo xuta nangui
Israel cojo nandya Samaria,
nandya rcun rẽ me, hacuaha cojo
xuta nangui Judá cojo nandya Jerusalén. Cuitjin cachja me:

—Ndandaja tinuhyun tsẽhẽ cjua xi cuichjá cojo nuju.
Nihñucuendun cjua vi ta Nina ne, cuinchajyẽ me yun. Chja me ta
xuta xi tsitsehen me xicjin me xi cuihndiin me tsẽhẽ Nina ne, nandya
Samaria siu me. Hane yungun rẽ nina ndacha ne, Jerusalén siu.
Vẽhẽ xi chja Nina xi cavejña ngu cacun me xi tsinguetsun me
nandya Samaria, nandya rcun rẽ nangui Israel. Hane tsẽhẽ nandya

vēhē ne, xi cuangui ni ne, ngu xtin ni xondyojo. Hane nina ndacha xi catsindaja me ne, cuetsun, hane ya ximincharcun rē me ne, cueti. Hane sacuaha xuta nandya Jerusalén, nandya ximincharcun hiscan caviyuju cahndē Nina ne, tifayangui me xcusun rē xuta nandya Samaria hane tifaharcun me nina ndacha. Vēhē xi Nina ne, sua me cahndē xi sindadu cjín rē ngu nanguixin ne, scaa rē xcun si cojo xuta nangui Israel, hane cjuecojo me presu. Hacuanitjin ne, tsingatju me sindadu cjín xi cjuē tsinguetsun rē nandya Jerusalén. Cojo ngahñu cjuá nuju ne, tuhun cjuáñihi xi cuma rē xuta. Chjuhun ndava me; chjuhun nangui rē me. Vēhē xi cojo cjuáñihi xi satē nuju ne, caveni xi xuta xi cavaxijin Nina má yun ta cuma jeya yun. Ngayun xuta xa rē ne, meje rē xi hyun mé xi ndaja, mé xi ndajin. Peru xi ndaja ne, miji nihñu. Hane xi ndajin ne, vēhē tuhun rē cjuasua yojo nuju. Vēhē xi handasa nihñu oración nuju ne, Nina ne, cjuayanguiin me tsujun.

Hacuaha cachjataha Miqueas cha profeta xi chja xu cjuá rē Nina. Me vēhē ne, jo cjuatacun rē me, tucutjin chji xi sacu rē me ne, cuichja me. Cjuandaja rē Nina ne, sacuiin rē me. Hisca cjuá rē Nina sacuiin rē me xi cuichja me cojo xuta.

Hacuaha cachja Nina xi hisca nandya Jerusalén cojo yungun xi matitjun xi siu ngajan ne, satë rë xi cuetsun hane ngajan cuetju xca nguijña. Cuatjin cumá ta xuta xa rë ne, sahmii chihin me cjua rë ley ta tséhë xi faha me tujún xi cuaxëtje me xcusun rë xuta tsehen. Hacuaha cuatjin cumá ta yo xi má xu profeta ne, fehya me tujún hane sahmi me consulta. Hane xi má rë me ne, má sahmi me xi sahmi me ta sahmi Nina cuidadu me ta Nina ne, tacun me ngatsë rë me. Peru cumajin cuaxëtje me yojo rë me cuatjin.

Sehe cachja Miqueas tséhë nixtin xi cuijnetaha sua Nina cjuañhi xuta tjë vë, hane jercu ndaja cuatju me. Cuitjin cachja me:

—Ngu nixtin ne, naxi hiscan xi tacun yungun rë Nina quihndë ne, ngajan naxi vëhë cuma cahndë rcun rë yëjë ni ngasunhndë. Hane xuta tséhë yëjë ni nangui cjin ne, cjuehe me ngajan cojo sa xi cuma rë me cjua rë ley xi cuicuya Nina cojo sa xi cuihndë me tséhë. Nixtin hya ne, ha quihndë cumajin si, hane yëjë ni xuta ne, cuiyuju me cojo cjuandaja cjuajeya. Hane xuta tjë rë Israel xi cuiyuju me ngu nanguixin ne, cuya cuiyuju cahndë me nangui xi casatë rë xutachanga rë me ngajan nangui Israel. Hya xi tijima si cojo

sindadu condra nuju ne, hacuaha cumá nuju ngujyë xi cuangun cuinechun nangui tséhë xuta Caldea. Peru xi cuatjun vëhë ne, cuya cuma nga ngayun ngu xuta nangui venguichji rë. Hane ngaye, nandya Belén, ngaye nandya tséhë xuta tjë rë Judá ne, ngajñi rë xuta riji ne, cuetjutsejen ngu me xi cuitexa rë xuta nangui Israel.

Hya xi camá ne, sehe cachja Miqueas cuitjin:

—Nina ne, tsicanijiyë me ngayun xuta nangui Judá ta nismutacun me jiya hora. Tuhunhñu hitsë cjuatacun nuju. Ningatuhuntacun hacutjin camá hya xi cavaxë me xutachanga nuju tséhë nangui Egipto hane casahmi me xi nangui Canaán ne, camá tsujun. ¿Mé meje rë xi tahan rë Nina cojo sa xi sacu naja cahndë xcun me? Mamiji rë xi nicuhun chu xi tuhun rë me cjuatjo. Chuyiin rë me sá xi nicuhun quihndi nuju xi tuhun rë me. Xi mameje rë ne, ha hyun ta cachja quixi me cojo nuju. Meje rë xi ndaja nihñucuendun rë cjuacjintacun ngajñi nuju, meje rë xi tjin nuju cjuayumatacun, hacuaha meje rë xi ninguijnu cjuatacun nuju hane cuinuhyun tséhë Nina. Peru cahndë rë vëhë ne, hacjahi má xcusun nuju, hane tsajin cjuaninchataha xi cumá nuju. Hya xi nihñuchuvun

mé xi cuiteñu ne, hacuiin ndaja nichuvun. Ngayun xuta nchina ne, jemu xati macjan nuju. Ngayëjë ni ngayun ne, jemu ndesu yun, hacuaha jemu xuta ndacha yun. Tinihñu cjuatsehen rë xuta nangui Israel xi cavetsihin hya xi cavitexa nima Acab. Vëhë xi cuma nuju castigu. Sahmi Nina xi xuta condra nuju ne, scaa rë me xcun si xi sahmi me cojo nuju hisca xi cumá nuju castigu xi satë nuju tsëhë jyë nuju. Hya xi cjuë vëhë ne, sehe sahmi me castigu xuta condra nuju. Hane xi cuatju nixtin hya ne, cuya cuma nga ngayun ngu nangui hñu hane xuta nuju cuitexa me yun. Hya ne, hisca xutaxin ne, cuinduva tjengui rë me yun.

Sehe Miqueas ne, casahmi me oración rë me cuitjin:

—Nihñu cuidadu xuta xi canuxujun xi cuma tsujun. Nihñu cuidadu me sacuatjin sahmi cha paxtu rë chu tsánga rë cha. Tuhun cahndë xi cuinechin cojo cjuandaja cjuajeya nguehe nangui niji. Hacuaha nihñu cjuarcun xi cuma niji, cojo sá xi xuta xi yahnga ne, cjuaharcun me ngayun xi scuëë me xcusun nuju cojo niji. Ngayun ne, hacuiin tangun yun cojo nina ndacha. Tsajin yo xi jyihi sacuaha jyihi ngayun. Ninchatuhun niji tsëhë jyë niji. Ngatsë rë

cjuahmutacun xi tjin nuju ne, cuijnehnchan cjuacjan nuju cojo niji. Quixi yun cojo cjua nuju, vēhē xi macjain ná ta nihñu chihin cjua nuju xi catuhun rē xutachanga niji, nima Abraham cojo nima Jacob hane cuya ndaja nihñu nga cojo niji.

Xuta Asiria ne, tsinguetsun me nandya rē nangui Israel

(2 Reyes 14:26-29; 15:8-31; 17)

Jeroboam xi majo ne, jercu hñu cjua camá me. Hane cavisecoo Nina me xi cacaa rē me xcun si xi casahmi sindadu cjín rē me hya xi camá me xuta matitjun tsēhē nangui Israel. Hane nangui jan ne, ndaja cavatju xuta rē. Cuatjin casahmi Nina ta yuma má rē me xuta jan handasa hndiin xuta. Hane Jeroboam xi majo ne, cavitexa me nangui Israel xcun yachan ngu nu. Hane hya xi cahme me ne, quihndi rē me xi hmí rē Zacarías ne, camá me xingu xuta matitjun.

Hane Zacarías jan ne, hacuaha choho casahmi me xcun Nina sacuaha casahmi xutachanga rē me xi hacuaha camá me xuta matitjun. Sehe xi cafē jyun sa xi sahmi me gubiernu ne, ngu cha xi hmí rē Salum ne, catsiquehen cha me hane cafaha cha cahndē rē me.

Cojo Zacarías ne, camá ūnuju xutatjē rē nima Jehú xi cavitexa me nangui Israel. Hane ngajan camá chihin cjua xi cachja Nina cojo nima xi ūnuju xutatjē rē me cuitexa me, ta sacuaha cha Salum ne, hacuiin tjē vē má cha.

Hane Salum ne, ngu sa cacaa rē cha cavitexa cha ta ngu me xi hmi rē Manahem ne, catsiquehen rē cha hane cafaha me cahndē rē cha.

Manahem jan ne, tē nu cavitexa me. Hacuaha choho casahmi me xcun Nina. Ngu nu xi tivitexa me ne, cafehe sindadu cjín rē nangui Asiria xi cjuaha xicjin cojo me. Hane cojo sa xi cuma cuitexa sa Manahem ne, casahmitangun me tujún rē xuta hane jemu cjín tujún cavechjijte me me xi matitjun tséhë Asiria. Hane xi cahme Manahem ne, quihndi rē me xi hmi rē Pekaía, camá me xingu xuta matitjun.

Pekaía ne, hacuaha choho casahmi me. Hane xi cafē cavitexa me xcun jo nu ne, ngu me xi hmi rē Peka ne, meje cjuaha me cahndē rē me. Peka ne, catsiquehen me Pekaía hane cafaha me cahndē rē nima. Xati cavindeya xuta matitjun tséhë nangui Israel ta tséhë

**Zacarías hisca Peka ne, hñiu me casahmi me gubiernu nixtin hya xi
Uzías má me xuta matitjun tséhë nangui Judá.**

Hane Peka ne, hacuaha ngu xuta matitjun hngacacun má me.
Nixtin xi sahmi me gubiernu ne, cafehe Tiglat-pileser, me xi
matitjun tséhë nangui Asiria cojo sindadu cjín rë me, hane casahmi
me si cojo xuta nangui Israel. Cafaha me xuta rë ngujo nandya tséhë
Israel hane quijicojo me xuta xi siu nandya jan xi cuma me mosu
hndixahan rë me. Sehe hya xi ha cavitexa Peka xcun can nu ne, ngu
me xi hmi rë Oseas ne, catsiquehen me Peka hane camá me xuta
matitjun. Oseas jan ne, cavetsihin cavitexa me hya xi Acaz má me
xuta matitjun tséhë nangui Judá.

Oseas ne, camá me xuta matitjun xcun xi ñaja nu. Hacuaha
choho casahmi me xcun Nina, peru hacuiin jercu choho casahmi me
sacuaha yahnga nima matitjun tséhë nangui Israel. Hya ne,
Salmanasar camá me xuta matitjun xatsë rë nangui Asiria. Hane
cafehe me cojo sindadu cjín rë me xi sahmi me si cojo nangui Israel.
Hane cojo sa xi sacu cahndë xi cuya sindadu jan nangui rë me ne,
Oseas ne, cachja me xi cuechjitje me tujún. Hane cavechji me, peru

tsēhë xi meje rë Oseas xi cuma ndaya nangui rë me tsēhë nangui Asiria ne, catsingatju me ngu cjua tsēhë So, me xi matitjun tsēhë Egipto, hane cafehya me xi cuisecoo me cojo sindadu rë me cojo sa xi quihndë suaain xuta nangui Israel tujún jan. Hya xi camá ne, camachaya rë Salmanasar cjua jan, hane cavitexa me xuta rë me xi cjue jaha me Oseas sehe caveya me ndavaya. Sehe quiji me cojo sindadu cjín rë me hane caviyujutahandee rë Samaria, nandya rcun rë nangui Israel. Xuta nandya Samaria ne, cacaa rë me jyan nu, peru



xi cafē jyan nu ne, camá cavisehen sindadu nangui Asiria nandya jan. Hane xi cavisehen me nandya jan, cafaha me yējē xuta rē hane quijicojo me ngajan nangui Asiria, sehe ngajan cavyuju cahndē xuta jan ngajñi rē xuta nangui Asiria. Ngajan cafē gubiernu rē nangui Israel. Oseas ne, camá me xuta matitjun xi cajnetaha tsēhē nangui Israel.

Yējē cjuava vē ne, camá ta Nina casua me cahndē xi cumá ta xuta nangui Israel ne, cavetaharcuaain me cjuá rē ley rē me. Xuta jan ne, quijinduju me cafaharcun me nina ndacha. Casahmi me ngasunscun hisca xi catsiquehen me chu xi casua me cjuatjo cojo nina jan. Handasa vēe me xi casacu rē me nangui rē me ta Nina ne, cafahaxin nangui vē tsēhē xuta cananeo ngatsē rē cjuatsehen rē me, pero sehe casahmi xuta nangui Israel yējē cjuatsehen xi casahmi xuta tsehen jan. Hacuaha handasa catsingatju Nina profeta xi cavicuya rē xuta hacutjin meje rē xi cuma ndaja me cojo Nina, hane cjuaharcun nga me Nina, pero cavetaharcuaain me tsēhē profeta jan. Hane cahndē rē vēhē ne, casahmi me jo hndindyaja tsēhē oro xi cafaharcun me. Hisca catsiquehen me quihndi rē me xi casua me cjuatjo cojo nina ndacha jan. Hacuaha quiji tjengui rē me xuta xi

sahmi me consulta. Hane cojo yējē ni cjuatsehen vēhē ne, Nina ne, camacjan rē me, hane camá xuta jan castigu. Hya ne, ngu sa gubiernu rē nangui Judá cavejña. Hane hisca xuta vē ne, hacuiin ndandaja tisahmi me ta hacuiin ndaja hndē me tsēhē Nina.

Hane sacuaha nandya Samaria cojo yahnga nandya rē nangui Israel ne, hya xi cama tiya ta quijocojo sindadu Asiria xuta rē ne, cavitexa me xi matitjun tsēhē nangui Asiria xi hacjahi xuta cuinduva cjin me xi cuiyuju me nangui vē. Xutaxin xi cuacun jan ne, hacjahi hacjahi tjē má me, hane jimangu tjē vēhē ne, tjin rē me nina ndacha rē me xi faharcun me xi canduva me cojo. Peru xi cavetsihin cavejñacakndē me ngajan nangui Israel ne, catsingatju Nina chu xa xi cavisehen chu ngajan, hane catsiquehen chu ngujo xuta. Vēhē xi catsacjun xuta camá, hane meje rē me yo xi cuicuya rē me tsēhē nina rē nangui Israel. Hya xi camá ne, me xi matitjun tsēhē nangui Asiria ne, catsingatju me xi cuya ngu nahmi rē nangui Israel hane cuicuya me xuta vē hacutjin meje rē xi cjuaharcun me Yahvé, Nina xi cjuaquixi. Sehe casahmi xutaxin jan sacuaha cavitexa nahmi xi chja me tsēhē Nina, peru cama jo cjuatacun rē me ta hacuaha casua me

cjuatjo cojo nina ndacha rē me. Hacuiin ndaja cahndē xuta jan tsēhë
Nina ta casecjan cjuachacun rē me.



Nangui Judá ne, ngajan vitexa Ezequías,

hane vihndē me cjua rē Nina

(2 Reyes 18-20; 2 Crónicas 29-32; Isaías 36-39)

Hya xi cahme Acaz, quihndi rē me xi hmí rē Ezequias ne,
cavitexa me nangui Judá. Ezequiás ne, ngu me matitjun xi ndaja
camá me. Casahmi me sacuaha vitexa ley rē Nina. Catsinguetsun
me ngasunscun xi catsindaja xuta xi sua me chu sacuaha cjuatjo

hiscan xi cjuaharcun me nina ndacha. Xcun nu tjun xi cavitexa me ne, cavetsihin casahmi tyjahi me yëjë xcusun xi tsëhë Nina. Cavaxë me yëjë xcusun xi machjirëhë tsëhë nina ndacha. Hacuaha cavutsejen ndaja me xi casahmi me yëjë ni tucutjin chja cjua rë Nina. Cuatjin camameje rë ta nixtin xi cavatju ne, jemu cavetsun yëjë ni. Casahmi ndaja me tingotjo yungun. Casahmitangun me yëjë nahmi cojo yahnga xuta tjë rë Leví hane cachja cojo me xi meje rë xi cuidadu sahmi me xa rë me cojo sa xi tjin cjuaquixi xi tivihndë me tsëhë Nina. Cuatjin meje rë ta Nina ne, casua xu me cjuañihi nangui Judá ngatsë rë me cojo ngatsë rë xi catsichaja me xcun xa rë me. Hya xi camá ne, xuta tjë rë Leví ne, casahmi me yëjë ni xi cavitexa Nina cojo sa xi tsingacun xi tyjahi me xcun Nina. Sehe cavaxë me yëjë xcusun xi cavincha xuta cahntsua yungun xi hacuiin tsëhë Nina má. Sehe cafaha me xcusun xi cachja Nina xi cuiyuju cahntsua yungun, catsityjahi me yëjë ni, sehe caviyuju chihin me yëjë vë cahndë hiscan cavitexa Nina xi cuiyuju. Casahmi me cuatjin ta hya xi cavitexa nima Acaz ne, jemu casecjan xcusun hane catsindeya nima yëjë ni. Hane hya xi camá tyjahi yëjë ni xcun Nina ne, cavitexa Ezequías nahmi xi tsiquehen me chu sacuaha cjuatjo tjinchihin hacuaha sacuaha cjuatjo tsëhë jyë rë me. Sehe casua me

xa xuta levita xi së me hane tsijane me ngajan yungun sacuaha cavitexa nima David. Hya xi camá ne, tacunxa yungun sacuaha cavitexa Nina xi cumameje rë xi cumá.

Hya xi camá ne, catsingatju Ezequías cjua cojo yëjë xuta nanguí Judá cojo xuta nanguí Israel xi cuinduva me yungun sahmi me suhi rë Pascua. Hitsë sa jyë suhi casahmi me xi camá nu hatsëë ta cjin nu catsicjëya xuta suhi jan, peru quihndë camá. Yëjë xuta nanguí Judá ne, cafehe me. Hacuaha cafehe xuta nanguí Israel, peru hacuiin cjin me vë cafehe me ta yahnga me ne, cavejnucëë me suhi. Teñuju nixtin cacaa rë suhi. Hane xi xcun suhi jan ne, quiji xuta catsinguetsun me yëjë ngasunscun xi hacuiin tsëhë yungun rë Nina xi siu Jerusalén. Hacuaha catsinguetsun me ngasunscun hiscan xi ti tyjungunsa xi faharcun me ndajyë, ta sehe suva Nina cjuaharcun me, hane cjuaharcun me Nina cahntsua yungun. Yahnga xuta xi canduva cjin me suhi ne, camajin catsityjahi me yojo rë me xcun Nina Peru meje cjuaharcun me Nina xcun suhi. Vëhë xi Ezequías ne, casahmi me oración rë me xcun Nina hane cafehya me Nina xi sua Nina xuta vë cahndë xi cuma sinësuhi me. Hya xi camá ne, Nina ne, catsityjahi me xuta jan. Hane xi cajnetaha suhi ne, xuta ne,

quiji nguehe quiji ngajan me catsinguetsun me yëjë ngasunscun xi casacu rë me nangui Judá. Hacuaha cuanitjin casahmi me ngu jo nandya nangui Israel. Sehe jima ngu me cavuya me quiji me ndava me. Hane Ezequías ne, casahmi me xi nchunchujun ni sua sa me cjuatjo ngajan yungun sacuatjin cachja Nina xi cuma. Hacuaha casua me xa xuta tjë rë Leví cojo nahmi. Ezequías ne, cavihndë me tséhë Nina xcun yëjë xa vë xi casahmi me, hane jemu cachuya rë Nina tséhë me hane ndaja cavatju me.

Xcun nu xi cavitexa Ezequías nangui Judá ne, Salmanasar, me matitjun tséhë nangui Asiria ne, cafehe me nangui Israel cojo sindadu cjín rë me hane catsinguetsun me Samaria, nandya rcun rë. Sehe quiyi cojo me yëjë xuta nangui Israel xi siu. Cavatju të nu hane sehe cahme Salmanasar, hane Senaquerib camá me xuta matitjun ngajan. Sehe Senaquerib jan ne, cafehe me nangui Judá cojo sindadu cjín rë me hane cacaa rë me cafaha me yëjë nandya nangui Judá. Suva nandya Jerusalén ne, camajin cafaha me nandya vë ngutjen. Sehe Ezequías ne, cachja me xi cuechjitjë me tujún cojo Senaquerib. Casua me yëjë tujún xi cavetjo rë me cojo tujún xi tséhë yungun. Hisca cafahaxin me oro xi cavincha me tingotjo

yungun hya xi catsindaja me tingotjo jan hane casua me Senaquerib. Peru Senaquerib jan ne, manguaaincacun me cojo tujún jan hane catsingatju me cjua vihi xi cachja xuta xa rē me cojo Ezequías:

—Ngaye ne, tsajin ri ngahñu xi scaa ri xcun si sa xi meje nihñi si cojo ná. Sá xi má ri xi cuisecoo ri sindadu cjín rē Egipto ne, tsajin cjuaquixi cojo me vëhë. Sá xi má ri xi cuisecoo ri Nina riji ne, quixiin vë ta tsejen xi caninguetsin ngasunscun rē me.



Sehe cajindaya xuta xi catsingatju Senaquerib cojo sa xi cuihndë yëjë xuta nandya Jerusalén. Cuitjin cajindaya me:

—Caveni macjain nuju cjua rë Ezequías, me xi matitjun tsujun. Meje rë me xi macjain nuju nina nuju, peru nina nuju ne, cumajin cuaxëtje nuju tsijin. Ngayin ne, cacaa niji xcun si cojo jemu cjin nangui hane tsajin hisca ngu nina rë me vë xi cama cavaxëtje rë me hya xi cafihin. Nuxuhun tingotjo nandya nuju cojo sa xi cuisihin cojo cjuajeya hane tsajin mé xi cuma. Cuma cuangun chjuhun xitjë nuju. Cuatjin cumá, hisca nixtin xi nduvin xi cuanguincuijin nuju ngu nangui xicjin tsujun.

Peru xi cajnetaha cachja me, tsajin yo xi catsicuya cjua tsëhë me ta cuatjin cavitexa Ezequías. Hya xi camá ne, quiyi Ezequías yungun hacuaha catsingatju me cjua cojo profeta Isaías. Hane profeta Isaías ne, catsingatju me cjua cojo Ezequías xi cumangucacun me ta tsajin mé cuma ta ndicumahani cuya cjue Senaquerib nangui rë me. Chja me xi cjuahatsja Senaquerib cjua xi tijima cjuacjintacun ngajan nangui rë me, vëhë xi cuya me ngajan hane ngajan cueya me.

Cuatjin cachja xuta vë cojo Ezequías. Hane sehe cafe xutaxa rë Senaquerib hisca cavyuju sindadu rë me.

Xi cavatju hitsë nixtin ne, cafehe nga xuta xi canduva cojo ngu xujun xi catsingatju Senaquerib. Hane xujun jan ne, ha vëhë ni chja. Hya xi cavutahaya Ezequías xujun jan ne, quiji me cavisehen me yungun hane casua me nacuechji rë Nina. Hacuaha cafehyá me Nina xi cuaxëtje rë nangui Judá tséhë xuta nandya Asiria. Cachja me xi sá xi cuisecoo Nina me ne, xuta xi siu me jinguyëjë rë nangui ngasunhndë ne, sacu rë cjuaquixi ta me vëhë xi Nina me. Hya xi camá ne, catsingatju Isaías cjua cojo Ezequías ta Nina ne, cahndë me cjua rë me, hane cuisecoo me, hane sindadu cjín rë nangui Asiria ne, tsajin mé sahmi me cojo nandya Jerusalén. Cuatjin cachja me. Hya xi camá nguixun ne, Nina ne, catsingatju me ángel rë me xi catsiquehen jemu cjín sindadu rë xuta Asiria. Hane ngatsë rë cjuaçjintacun vëhë ne, cavuya Senaquerib nangui rë me cojo sindadu rë me. Hane hya xi ha cavyuju me Ninivé nandya rcun rë me ngu jo nixtin ne, quiji me yungun rë nina ndacha rë me. Hane ngajan cavisehen jo cha quihndi rë me xi catsiquehen rë me. Ngajan cavetjucaa cjua rë Nina xi cachja Isaías cojo Ezequías. Hya xi camá

ne, ngu quihndi rë Senaquerib xi hmi rë Esarhadon, camá me xuta matitjun tséhë Asiria.

Xi cavatju hitsë nixtin ne, cavetju rë Ezequías ngu nindu titsë hane camá hmu tojo rë me. Hane Nina ne, catsingatju me profeta Isaías xi cuichja me cojo rë me xi cueya me cojo chíhin jan. Hya xi camá cachja me ne, cafe Isaías. Ngajan xi jercu camá hai cacun Ezequías, hane jemu cajihnda me. Cafehya me cjuayuma rë Nina sehe catsinguitsjen rë me Nina xi jercu casahmi me ngahñu xi cahndë me tséhë Nina xcun cjuahñu rë me. Hya xi chaja sa xi cjuehe Isaías ndatsen ndihya rcun rë Ezequías, sehe cachja Nina cojo me xi cuya cuichja nga me cojo Ezequías xi ndatjin, cueyaain me cojo chíhin vë ta xcun tyuhun nu sa cuejña me cjuahñu. Hya xi camá ne, catsindaja Ezequías ngu sun xi sua me nacuechji rë Nina ta jemu ndama rë me.


Nixtin hya ne, Merodac-baladan, me xi matitjun tséhë nangui Caldea ne, cahndë me xi jercu hmu rë Ezequías. Hane catsingatju me xutaxa rë me xi cjuecani me cjuatjo cojo xujun xi cuahatsja Ezequías. Hane xi cafehe xutaxa jan ne, Ezequías ne, jemu ndaja

cafahatsja me xuta jan, hacuaha cojo sa xi cjuercun rē xuta jan ne, catsingacun me me yējē ni cjuanchina rē me. Hya xi quihi xuta jan ne, cachja Isaías cojo Ezequías xi cuechu nixtin xi sindadu cjín ladu rē xuta jan ne, cjuaha me yējē cjuanchina vē cjuecojo me nandya Babilonia, nandya rcu rē Caldea. Hacuaha cachja me xi cojo quihndi rē Ezequías ne, cjuecojo me Babilonia hane ngajan cuma cha mosu hndixahan rē me xi matitjun ngajan. Peru Ezequías ne, hacuiin camacjincacun tsēhē yējē vēhē ta xi ma rē me ne, sa xi tsajin cjuacjintacun nguyējē rē xi tacun me cjuahñu ne, cuendaain rē me tsēhē yējē ni xi cuma ngascan. Hya xi cahme Ezequías, ha casahmi me gubiernu nangui Judá xcun can ñaja nu. Hane quihndi rē me xi hmi rē Manasés ne, camá me ngu xatsē xuta matitjun.

Nixtin xi casahmi gubiernu Manasés, Amón cojo Josías nangui Judá

(2 Reyes 21:1-23:30; 2 Crónicas 33-35; Jeremías 1-6)

Hya xi cahme Ezequías ne, Manasés, quihndi rē me ne, cavitexa me nangui Judá. Jemu tsehen camahani xcusun rē me. Cavuya catsindaja me yējē ngasunscun xi catsinguetsun nahmi rē me cojo sa



xi cjuaharcun nga xuta nina
ndacha rë ngasunscun vë. Hane
catsitsehan me xuta xi cafaharcun
me yëjë xcusun nina ndacha xi
cafaharcun xuta xi siu tahandee rë
me. Jemu jyë jyë rë me ta
casahmi me ngasunscun xi hacjahi
cahntsua yungun rë Nina ngajan
Jerusalén hane cafaharcun me
niñú. Hacuaha cavaca me ngu
quihndi rë me sacuaha cjuatjo rë
nina ndacha. Hacuaha quiyi

cavanguise me xuta xi sahmi me consulta, cojo cha surqui xi choho
sahmi cha tsëhë xuta, cojo cha xi chja cojo hasen rë nima. Hane
ngatsë rë xcusun rë me ne, cuanitjin casahmi yëjë xuta xi me vëhë
vitexa rë me. Hane Nina ne, jemu camacjan rë me cojo Manasés
hacuaha cojo xuta nangui Judá.

Ngatsë rë cjuatsehan xi tisahmi Manasés ne, catsingatju Nina
ngujo profeta xi cachjataha me xuta nangui Judá. Cuitjin cachja me:

—Xcusun xi casahmi Manasés ne, hitsë sa tsehen má xi cumá rë xcusun rë xuta amorteo xi cavaxëxin xutachanga nuju nangui vi. Hacuaha ngatsë rë me ne, yéjë xuta nangui Judá ne, hacuaha tifaharcun me nina ndacha. Véhë xi cuitjin chja Nina: “Sacuaha castigu rë xuta nangui Judá ne, sahme xi jercu cjín cjuacjintacun satë rë me cojo nangui rë me cojo nandya ximinchacun naха, nandya Jerusalén. Suá cahndë xi xuta condra rë me ne, scaa rë me xcun si xi cuma cojo xuta nangui Judá hane tsinguetsuntë me vëhë yéjë ni xi tsëhë xuta. Sacuaha ndujnu rë ngu tyuva hane tyahi cueñña ne, cuatjin sahmi condra rë me cojo nangui Judá. Hatuxa jemu chocho xcusun rë xuta vi hisca nixtin xi cavaxêtje me tsëhë nangui Egipo hiscan quihndë hane casahmi me xi camacjan ná. Peru quihndë ne, Manasés ne, cavesuntaha me xi cun rë me ta hitsë sá cun rë me xi cama rë yéjë xutachanga jan. Véhë xi jemu tu chja camahani cjuañhi xi suá rë me.” Cuatjin cachja Nina.

Peru tsajin yo cavisehen rë xi cachja profeta jan. Hane Nina ne, casua me cahndë xi sindadu cjín rë nangui Asiria ne, cafaha me Manasés, catsihñu me sa tsja sa ntsacu me, hane cavincha me ngu rueda ndetjun me, sehe quijicojo me Babilonia, nangui rë me.



Ngajan ne, jemu jyé cjuañihi cavatju Manasés. Hane ngajñi rë cjuañihi vëhë ne, cafehya me cjuandaja rë Nina ta jercu choho ma rë me hane cavijacun me jyé rë me xcun Nina. Hane Nina ne, cahndë me tsöhë cjua rë Manasés hane casua nga me cahndë xi cuya me Jerusalén hane cuya cuma nga me xuta matitjun ngajan. Hane ngatsë rë castigu vë ne, camachaya rë Manasés xi Yahvé ne, me vëhë xi Nina cjuaquixi me. Hane xi cavuya me nandya Jerusalén ne, catsinguetsun me yëjë ngasunscun xi casahmi me tjun, hanecafahaxin me yëjë ni nina ndyojo xi siu cahntsua yungun rë Nina.

Hya xi casahmi tyahi me yungun xcun Nina ne, catsiquehen me chu xi casua me cjuatjo cojo Nina. Hane cachja me cojo xuta nangui Judá cojo sa xi cuinchahaxi me xi cjuaharcun rë ngu ni Nina xi cjuaquixi. Cavejñahñu me xondyojo xi vihndeen rë Jerusalén hane catsingatju me sindadu rë me xi cjuahacuenda me yahnga nandya xi tjin xondyojo rë, hane ngajan cuiyuju rë me. Cahme Manasés hya xi cajnetaha yachan tyuhun nu xi casahmi me gubiernu nangui Judá, hane quihndi rë me xi hmi rë Amón ne, camá me ngu xatsë xuta matitjun.

Jo nu ne, cacaă rë Amón xi cavitexa me nangui Judá. Cavihndiin me cjuá rë Nina. Cafaharcun me nina ndacha vë xi cafaharcun nima nahmi rë me hya xi chaja sa quiijí nima presu. Hane tséhë xi tsejen xi hitsë sa choho xcusun rë me xi camá rë nima nahmi rë me nixtin tjun ne, ngujo xutaxa rë ne, catsiquehen rë me. Ngajan xi xuta ngarca ne, catsiquehen me xuta tsiquehen jan, hane cachja me xi Josías, quihndi rë Manasés ne, cumá me xuta matitjun rë me.

